

閩媛典第六十五卷

閩烈部列傳二十一

明十六 黃四娘

按漳州府志黃四娘龍溪人嫁李能方十餘日時嘉靖辛酉流寇突至家人各逃四娘爲所獲入廟欲污之給曰此地未便俟夜可乎賊然之過河投橋下死

黃二姐

按龍溪縣志黃二姐府學生元陽女初元陽與舉人林煉相友善許配煉之次子夔時年各幼交乳互育後元陽沒家日替未幾煉亦亡夔遂背盟別娶富民張氏女兄東昇欲訟之官二姐泣曰訟吾姑吾夫是訟我也夔聞感愧以金二鎰懇賠別嫁二姐曰吾志必死何以賠爲求婚者踵至母兄婉諭二姐撫父柩泣曰幼曾見乳於林母長曾拜見於夫翁不幸見棄何顏別適生不爲林氏婦死必爲林氏鬼遂密自經於父柩側家人救不及卓立如生鄉人爭往弔同里人方伯蔡公自爲文祭之郡丞李畿嗣爲營葬於馬岐鋪之左表其墓

丁大娘

按龍溪縣志丁大娘鄒塘丁椿女嘉靖間饒賊流劫時丁年十八未嫁隨父逃散遇賊驅去不從罵曰真賊我死不同汝去賊悅其姿復逼脅之丁望見前路有塘遂與行至塘投水死事聞有司爲祭葬仍表其門

陸瓊妻陳氏

按漳浦縣志陸瓊妻陳氏年十九嫁瓊未幾瓊亡翁以室隘移柩山陬陳請置臥內不聽明日往視柩大慟曰我在也夫暴荒野乎歸自縊死

康起鳴妻陳氏

張冠期妻朱氏

黃輝妻王氏

按漳浦縣志陳氏陳德昌女年十九適士人康起鳴將一月而夫亡罄房奩爲喪具及卒哭母令歸寧泣曰無復歸理矣入臥房自縊死嘉靖二十一年旌表

按漳浦縣志朱氏張冠期妻嘉靖季

倭寇攻城冠期登城禦賊被傷死朱遂自縊

按漳浦縣志王氏黃輝妻鎮海人嘉靖四十年閏

五月饒賊襲陷衛城輝出覘賊賊猝至入室王度不免賊戴其夫帽氏大罵以手批賊頭墜其帽賊

怒殺之事見黃氏家譜

林可貞妻游氏

陳基妻黃氏

朱氏黃氏

翁瑞夫妻林氏

按漳浦縣志林可貞妻游氏爲饒賊所擄繫行至天尊堂投井死

按漳浦縣志衛學生陳基妻

黃氏饒賊陷城基持刀與鬪賊格殺之黃投井死

按漳浦縣志朱氏生員黃師文妻黃氏涂文

妻姑嫂也嘉靖辛酉遇饒寇之難同被執俱投井死

按漳浦縣志翁瑞夫妻林氏被賊執不屈

抱子投井死

朱簣妻蕭氏

許氏蔡氏張氏附

吳志豪妻陳氏

蘇氏

按漳浦縣志朱簣妻蕭氏遇寇亂同妯娌許氏蔡氏張氏俱自縊死

按漳浦縣志陳氏吳志豪

妻聞寇陷城投井死

按漳浦縣志蘇氏不知其夫遇賊罵不絕口被支解

朱鐸妻戴氏

按漳浦縣志戴氏生員朱鐸妻扶姑避賊遇賊欲繫之罵曰吾頸可斷不可繫賊怒斫之并欲殺姑

戴負重傷翼蔽姑曰寧殺我賊義之並釋焉出城復遇倭寇不屈如初遂見殺後五日家人收其屍

顏色如生

陳應科妻黃氏

按漳浦縣志陳應科妻黃氏嘉靖末饒賊陷城黃適歸母家父命與俱逃嘆曰賊盈城逃焉往賊至攻撤其門黃義不受辱投井死其母繼之

陳纘妻程氏

按漳浦縣志程氏陳纘妻纘客死高郵程年二十八訃至號慟幾絕成服拜舅姑畢以舅姑託其姒就寢視之死矣有司上其事旌表

程嗣衰妻王京姐

按漳浦縣志王京姐知縣王謐女性慧知書年十七適邑人程嗣衰夫妻相敬如賓踰年衰死王年十九號哭頓絕家人防之不獲死將空投穴眾扶抱而出遂登樓自縊死其衣衾簪珥皆以預置殮具有司以聞旌表

鄭承惠妻黃氏

按漳浦縣志黃氏黃仕求女年二十一適鄭承惠三年而寡哀號籲天願以死從越七日哭奠如禮自縊死其殮具皆預爲之嘉靖間有司上其事旌表

施君盡妻陳清藻

按漳浦縣志陳清藻佛潭橋人年十八適儒士施君盡施家貧陳甘辛苦孝養舅姑未幾君盡遘疾不起陳累禱請以身代及亾市衣飾以殮日夜號哭不食登樓自縊死

黃龍妻吳尾娘

按漳浦縣志吳尾娘雲霄人幼端靜讀書曉大義年十八適諸生黃龍事舅姑孝食貧採薪躬爨無所辭勞無何龍亡吳氏抱二歲子付其姑號慟絕粒兩拳撫膺五孔出血越二日死於棺側

林作惠妻郭氏

按漳浦縣志郭氏崎林人適林作惠生一男年二十八夫亡以死自誓其家防之嚴弗獲所志一日忽付孤於姑曰吾將往視夫墳至墳所拜哭盡哀投深潭死縣令房寶表其閭

陳茂馨妻許氏

女

按南靖縣志陳茂馨妻許氏資偉孫婦資偉歿時妻林年二十九子漢在襁褓越七日又產遺腹子湍家甚貧乃鬻嫁時衣物爲喪葬費繼祖姑憐林少寡欲嫁之林剪髮自誓指天泣曰婦去置二孤何地且婦欲死久矣所以不死者懼陳氏之不血食也祖姑聞其言悲之歲時祭祀賓客教養二孤俱以紡績自辦守節六十餘年學使廉其事給米帛表其門嘉靖辛酉饒賊攻陷邑城林氏年九十四子漢已死湍應貢郡下惟孫茂馨侍左右林氏曰吾今可以見而祖矣茂馨妻許氏度賊至不得免偕其女陳二姐與茂馨訣曰吾母女且死祖姑老汝第扶去或可脫免吾無恨矣賊既至母女俱投井死賊倉皇不知所爲乃舍置茂馨令扶老嫗走仍爲出二屍付之十日始獲殮面色如生許氏峽江訓導許浩然女死時年三十四陳二姐年十四鄉人聞者見者無不泣下事聞郡守爲之助葬

王維垣妻楊氏

按南靖縣志楊氏舉人楊參之曾孫女生員王維垣妻性沉靜寡言事翁姑孝及翁姑沒翁有妾相夫事之如母夫有弟導夫撫之若子嘉靖辛酉饒賊陷城與夫相失被執欲污之不從罵賊而死時

人欲上其事維垣止之

沈種妻黃氏

按詔安縣志黃氏沈種妻歸三載夫病亡越三日棄女投繯死年十有八奉詔旌表

毛氏

按詔安縣志毛氏懸鍾人嘉靖間曾一本作亂海上其夫從征朝發而夕死氏聞哭之水涯見有扇從海上飄來氏認係夫手澤遂赴海而死時見有血一圜潰死所不散衆多異之

陳誥妻王品姐

按詔安縣志王品姐陳誥妻夫病減食積米爲市藥費夫死旣殮卽入自縊家人救之氣未絕踰日而甦朝夕哭奠及卒哭盡散器物與人人咸疑之至夕整服自縊死顏色如生時年二十一

胡士麟妻鍾尾娘

按詔安縣志鍾尾娘鍾邦華女年十八適生員胡士麟舅姑先喪事祖姑以孝聞嘉靖間麟以家貧教讀五都得病氏聞廢食與家人往視進奉湯藥越二日而麟死負舟載屍歸殮畢卽潛入臥房自

縊死縣令表其門

吳貞姐

按詔安縣志吳貞姐年十五未許人嘉靖間海賊突至貞姐與父俱擄焉賊欲犯之大罵不從賊取盛飾置前曰汝箝而飾吾將室汝貞姐度不能免給曰吾當以告吾父時其父另載賊信之移舟遂躍入海屍浮數里不沉賊爲之歎惜撈屍具棺以歸縣令聞而祭之

蕭哲妻黃氏

按詔安縣志黃氏蕭哲妻年二十六夫歿一女甫周歲守死不嫁舅姑陰受他聘擇日欲強遣之黃懇於姑曰亟還他物吾死不入其門姑怒詈之黃度不免夜三鼓棄女潛出爲死計女啼不絕聲黃躊躇恐舅姑覺而追之反襁負其女趨江潭插竹挂衣其旁自沉死

鄒大澤妻許佳娘

按詔安縣志許佳娘鄒大澤妻許士悅女年十八歸鄒克盡婦道二十五夫亡遺一子慟哭頓絕誓不獨生每泣必撫其孤曰吾不能卒育汝矣姑聞防之頗嚴起居食宿與俱踰月守者憊一夕姑視

釀於別室遂自縊死

陳養望妻吳英姐

許傍妻林月娘

按詔安縣志吳英姐陳養望妻夫亡自縊柩側縣令吳桂表其門

按詔安縣志林月娘生員林

國光女年十八適許傍事舅姑未踰月夫亡月娘朝夕悲號誓欲與夫同死姑勸不聽勺水不入口
哀毀骨立三越月而沒與夫同葬

吳開姐

按海澄縣志吳開姐許配儒士黃旭炯年十八聞旭炯病革密禱求以身代訃至欲自經父止之曰
女子死夫當在夫家此非其所也遂吞聲拭淚促弟輩往白炯家素帷白燈導之去哭奠如儀晨夕
坐臥喪側炯母知必死防之甚周迨卒哭成禮會諸姻戚談笑自若防者稍疎遂沐浴整衣自縊死
奉旨建坊旌表

江勤姐

按海澄縣志江勤姐許配龍溪儒士郭遜遜病亡江持服哀慟累日不食所親譬解之不得自縊死

合葬於郭有司旌其門

林鳳翔妻葉二娘

按海澄縣志林鳳翔妻葉二娘同安葉士品女也夫亡事姑孝謹嘉靖三十八年倭奴入寇流賊乘倭劫掠葉往同安襄父喪與衆婦避賊涉淺溪猝與賊遇衆婦被執葉獨與抗賊按刃其脅葉大罵曰死賊何不速殺我賊刎其脣罵不絕聲而死萬曆丁丑奉旨旌之

郭四娘

按海澄縣志郭四娘者郭明先女嘉靖間許配劉運復未嫁劉讀書抱奇疾未幾身死訃至四娘誓以身從父母防之密而志益堅歷五日晡時乘間自縊死遂合葬

蔡氏女

按海澄縣志蔡氏女父蔡明揚以女許配儒士郭顯仰仰死女年十八聞訃欲自經家人嚴守之不得死告父母欲奔喪父母難之潛受他聘女密縊寢室叔母救甦父母還他聘閨二月之朔晨冒雨奔郭撫棺慟哭落淚皆血設榻傍柩斷指自盟時酷暑柩中液出女以舌吮之卒哭家長爲仰立嗣

女相依不復歸寧親屬不得見面如是閨十年所仰始葬女哀慟絕粒死直指以聞建坊旌表

鍾三姐

按海澄縣志鍾三姐鍾可久女許配儒士曾省研研就學於外道亡女聞訃卽削髮往治喪哀毀骨立日不再食旣終喪旋自縊死

謝君福妻許氏

按海澄縣志許氏謝君福妻嘉靖辛酉氏年二十餘倭掠海濱君福攜妻避難道遇賊追甚急氏曰賊所以窮追利妾也得妾君必死不如棄妾自全妾死決不出鄉可收吾骸福故勇悍左提刀右挈氏狂走氏齧夫指自脫賊見氏美趣前擁之去氏佯從度去夫遠罵賊求殺不得遂投水中賊引出罵益甚賊刳其腹而死有司旌之

朱氏鍾氏

按海澄縣志許光妻朱氏許瑞妻鍾氏賊至溪尾先獲朱氏驅之去不從殺之并刳其孕曰使爾禍延鬼子繼獲鍾氏被脫追及之亦遇害屍寸寸斷里人傷焉

王大景妻蘇氏

按海澄縣志蘇氏王大景妻蘇克辨女也嘉靖間避倭鎮海饒賊襲陷衛城蘇氏與大景扶姑出奔遇賊死之賊退收其屍容色如生觀察黎元旌其門

鄭鴻澤妻詹氏

按長泰縣志詹氏欽化里民鄭鴻澤妻詹思元長女事舅姑能執婦道嘉靖間倭寇充斥嘗與衆言曰寇擄掠日甚若不幸遇賊有死而已未幾掠其鄉擄獲婦女甚衆詹獨抱八月幼子坐於田間寇奪其子刼之使行詹唾罵不顧賊殺之歎其節因舍其子寘之近村竟得全活死時年二十八

楊端妻王氏

按漳平縣志王氏和睦里謝畬民楊端妻嘉靖間饒賊攻刼土樓勢不能支王氏抱周歲兒投井中其夫急往援之曰爾男子也可以求生吾婦人義不可辱遂絕袂溺死

蔣元和妻鄧氏

按漳平縣志鄧氏名順感化里人文學鯤變女五歲通論語誦唐詩二百餘首年十二習女紅纂組

工緻每讀王婉容滿江紅詞及文山和句濡睫潛然蓋憐其薄命也十九適同里蔣元和未替而元和夭鄧哀毀忘生夫家故貧無子父母給之歸欲嫁之鄧度不免乃先自治衣殮父母防之密不得間卽妝次服鉛粉數兩以故告庶母朱并囑歸葬夫家語畢而絕蔣族昇歸與元和同窆其父爲之銘曰上從無夫下從無子庶幾來歸首丘此土此土維何上有籊竿下有潺湲籊竿之貞潺湲之清惟貞與清更千秋兮與爾幽宮鄰

戴和妻俞赦娘 吳紅保妻賴癸娘

按長汀縣志俞赦娘戴和妻嘉靖間寇變和陣亡俞被掠不污死 按長汀縣志賴癸娘吳紅保

妻年十九嘉靖辛酉五月被寇掠至潞潭投河死

鄧子舉妻楊氏 女良姐附

按寧化縣志楊氏鄧子舉妻也嘉靖四十年流賊過縣氏與小姑鄧良姐避賊至溪南烏礮石賊追

將及度不能脫姑嫂相抱投水死

鍾世瑄妻丘細姑

按上杭縣志丘氏名細姑來蘇里民鍾世瑄妻嘉靖四十年辛酉丘年二十三值廣寇梁紹祿劫縣丘被執於綠竹岡罵賊爲所殺遺三歲女於道旁家犬爲守之三日夫逃歸收之囊葬岡側有司表其廬

徐憲妻許氏 徐日燿妻舒氏

按武平縣志許氏庠生徐憲妻憲疾革令再嫁許泣誓無二志憲難之遂自縊憲亦尋亡有司臨奠題其墓 按武平縣志舒氏徐日燿妻年十八夫疾革命之曰善事後人氏曰爾先行我卽來視含畢密備殮具飲藥死合葬縣令巢之梁申請建祠城外祀之

鍾敬德妻李氏 程大韶妻張氏

按武平縣志李氏太學生鍾敬德妻年二十夫亡無子有老親守節四十年流賊破城以磁鉢刺喉而死 按武平縣志張氏庠生程大韶妻年十七夫亡三日殮畢自縊死縣令表其門

湛進姑

按歸化縣志湛進姑下覺里人有殊色年二十二夫亡侍養其姑嘉靖辛酉山寇至婦姑並被擄賊

奇進姑貌欲私之進姑給以夜期前驅至將軍橋潭水深泣謂姑曰媳欲終養恐身辱爲姑羞姑善自保遂投水賊意其誤援之不及越三日賊去屍乃浮鄉人爲建橋亭以志之縣令表其門

饒紅姑

按邵武府志饒紅姑饒禮生女許配同里黃黑未嫁黑亡紅姑聞訃爲持服旣三年父欲與締姻女不從父強受某聘女潛入臥內自縊死嘉靖七年諸生以聞於侍御聶豹下有司爲立石於墓

朱建妻施氏

按建寧縣志施氏朱建妻開山施宣保女也嘉靖辛酉賊掠開山施被執逼欲污之施以頭觸石大罵不止又取石擊賊賊婉語誘之罵曰砍頭奴汝逼我天將殺汝賊怒支解之其夫感婦義烈終身不復娶有司以祀風教祠

徐麟瑞妻唐丹桂

官異香

按建寧縣志唐丹桂廣昌唐坊人爲灣坊徐麟瑞妻年十七夫亡自經死邑人多作詩弔之
按建寧縣志官異香官祥之女失其夫名姑族有惡少潛入其室強欲求合逐之旋自縊死

陳氏女 賴孫盛妻陳氏

按延平府志陳氏女永安人嘉靖十二年流賊入境掠其家諸婦無一脫者女年甫及笄有殊色賊脅以刃不從諸婦曰姑從以緩死女號泣怒詈爪賊面流血遂遇害 按延平府志陳氏名菊香

賴孫盛妻永安人年二十四夫溺於灘遺孤甫三歲氏號泣累旬待柩歸治喪畢卽自經死

黃瓊妻徐氏

按延平府志徐氏黃瓊妻名冬使南平人少適瓊瓊子欲鬻之富商徐涕泣欲死富商驚異去瓊復誘惡少娶之徐度不能脫奔母與決母曰夫誠君子惡少固不足託無他匹乎徐歸卽自縊死嘉靖間有司營葬題其墓

溫敬妻余氏

按延平府志余氏溫敬妻將樂人及笄適敬越五年敬歿於河氏痛屍弗獲踰月哭聲不止父母召勸之默然引去出所衣衣及夫常服焚之而歸所有於姑示訣姑止之對曰吾惟有死以謝夫恨未得屍耳又踰月屍終未獲乃沐浴縊於夫寢年二十二嘉靖二十九年縣令王鈴教諭何大章爲之